

## VAUGHAN, JOHN (1663-1722), Cwrt Derllys, Caerfyrddin diwygiwr cymdeithasol a chrefyddol

**Enw:** John Vaughan  
**Dyddiad geni:** 1663  
**Dyddiad marw:** 1722  
**Priod:** Elizabeth Vaughan (née Thomas)  
**Plentyn:** Bridget Bevan (née Vaughan)  
**Rhiant:** Rachel Vaughan (née Vaughan)  
**Rhiant:** John Vaughan  
**Rhyw:** Gwryw  
**Galwedigaeth:** diwygiwr cymdeithasol a chrefyddol  
**Cartref:** Cwrt Derllys  
**Maes gweithgaredd:** Crefydd; Addysg; Gwasanaethau Cyhoeddus a Chymdeithasol, Gweinyddiaeth Sifil  
**Awdur:** Mary Clement

Mab John Vaughan, Derllys (1624 - 1684), bargyfreithiwr, a Rachel, merch [Syr Henry Vaughan, Derwydd, Sir Gaerfyrddin](#); ganwyd yn y flwyddyn 1663. Ei dadcu ar ochr ei dad oedd brawd [John Vaughan, y Gelli Aur, iarll 1af Carbery \(gweler yr ysgrif ar y teulu\)](#). Addysgwyd ef, yn ôl pob tebyg, yn ysgol ramadeg Caerfyrddin. Ar 6 Hydref 1692 priododd Elizabeth, ferch Thomas Thomas, Meidrym, a'i wraig Elizabeth (gynt Protheroe), cyfnither [Lucy Walter](#), mam dug Mynwy.

Yn ystod 20 mlynedd olaf ei fywyd John Vaughan oedd arweinydd bywyd crefyddol ac addysgol Sir Gaerfyrddin. Gyda chefnogaeth y S.P.C.K., gwnaeth ef a'i gyfaill [Syr John Philipps](#), Castell Pictwn, Sir Benfro, y ddwy sir hon yn llwyddiannus dros ben yn y fath bethau. Talodd John Vaughan sylw arbennig i sefydlu ysgolion elusennol a llyfrgelloedd ac i ddosbarthu llenyddiaeth grefyddol Gymraeg. Ef oedd arloesydd llyfrgelloedd rhyddion a llyfrgelloedd i blant; cefnogodd roddion arian o'r sir i dalu am addysg plant tlodion, a chymerai ddiddordeb neilltuol mewn tlotai ac mewn gwella cyflwr carcharau. Pwysleisiodd hefyd bwysigrwyd gweddi deuluol ym mhob cartref. Ef oedd maer tref Caerfyrddin am y flwyddyn 1710-11, a bu'n aelod o gyngor y dref o 1707 hyd 1722. Ei ferch, [Bridget Bevan](#), oedd prif noddwr yr ysgolion cylchynol Cymraeg. Bu farw ei wraig yn 1721 a chladdwyd hi yn eglwys Merthyr; bu yntau farw 16 Tachwedd 1722, a'i gladdu yn eglwys Llanllwch, Sir Gaerfyrddin.

Dilynodd ei frawd hynaf, RICHARD VAUGHAN (1653 - 1724), ei dad yn y gyfraith a bu'n feinciwr a thrysorydd Gray's Inn, aelod seneddol dros dref Caerfyrddin (1685-1724), cofiadur (1683-6, 1688-1722), a phrif ustus siroedd Caerfyrddin, Aberteifi, a Phenfro. Priododd [Arabella Philipps, Castell Pictwn](#), ac yr oedd felly yn frawd-yng-nghyfraith i [Griffith Jones, Llanddowror](#).

### Awdur

Dr Mary Clement

### Ffynonellau

S.P.C.K. records (Llundain)

cofnodion cyngor tref Caerfyrddin (Caerfyrddin a L.I.G.C.)

Archifau LIGC: [NLW MS 2B: Charity of John Vaughan of Derllys](#)

Mary Clement, 'Hanes yr S.P.C.K. yn Sir Gaerfyrddin o 1700 hyd 1750: gyda chyfeiriad arbennig at John Vaughan, Cwrt Derllys, a'i waith' (traethawd M.A., 1940)

Robert Harrison, *Some Notices on the Stepney Family. MS. notes* (London 1870)

William Spurrell, *Carmarthen and its neighbourhood* (Carmarthen 1860) (ail arg., 1879)

D. Lleufer Thomas, 'The Vaughans of Golden Grove,' yn *Oxford Dictionary of National Biography*

Thomas Shankland, 'Sir John Philipps,' *Trafodion Anrhydeddus Gymdeithas y Cymmrodorion*, 1904-5

Francis Jones, 'The Squires of Hawksbrook,' *Trafodion Anrhydeddus Gymdeithas y Cymmrodorion*, 1937

W. Moses Williams, 'The Friends of Griffith Jones,' *Y Cymmrodor*, 1939

Mary Clement, 'John Vaughan, Derllys, a'i Waith,' *Trafodion Anrhydeddus Gymdeithas y Cymmrodorion*, 1942

Lord George Scott, *Lucy Walter wife or mistress* (London 1947)

T. Kelly, *Griffith Jones, Llanddowror pioneer in adult education* (Cardiff 1950)

Mary Clement, *Correspondence and minutes of the S.P.C.K. relating to Wales 1699-1740* (University of Wales Press 1952)

Mary Clement, *The S.P.C.K. and Wales, 1699-1740* (S.P.C.K. 1954)

## Dolenni Ychwanegol

Wikidata: [Q20733677](https://www.wikidata.org/wiki/Q20733677)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

